



bil
01. 2020

PESONA PMJ

Santapan Intelektual

ISSN 2773-5605



POLITEKNIK MERSING JOHOR

Copyright © 2020

Hakcipta terpelihara. Tiada bahagian daripada terbitan ini boleh diterbitkan semula, disimpan untuk pengeluaran atau ditukarkan ke dalam ssebarang bentuk atau dengan sebarang alat juga pun, samada secara elektronik, gambar serta rakaman dan sebagainya tanpa kebenaran bertulis daripada pihak Politeknik Mersing terlebih dahulu.

Politeknik Mersing,
Jalan Nitar,
86800 Mersing,
Johor Darul Ta'zim.
Telephone: (+6)077980001
Fax: (+6) 077980002
Website: <https://pmj.mypolycc.edu.my/>

Dicetak di Malaysia.

Terbitan Pertama 2020.

ISSN: 2773-5605

e-ISSN: 2756-777X



Tinta Pengarah

ASSALAMUALAIKUM dan Salam sejahtera,

Terima kasih kepada sidang redaksi PESONA PMJ kerana sudi memberi ruang kepada saya untuk menyampaikan kata alu-aluan dalam e-buletin Pesona PMJ pada kali ini. Tahniah dan syabas diucapkan kepada sidang redaksi atas usaha dan kejayaan menerbitkan e-buletin Pesona PMJ yang sungguh bermakna ini. Semoga e-buletin ini boleh dijadikan sebagai wadah pembentukan wacana kritis kepada warga PMJ khususnya dan warga luar umumnya.

Dalam kesibukan kita mengejar kepesatan teknologi dan pecutan ekonomi, satu pandemik telah menular di seluruh dunia. Dalam sekelip mata sahaja, rutin harian kita yang sentiasa padat, sibuk dan kerap bersosial kini berubah. Kini, kita perlu menjalani kehidupan dengan amalan norma baru dengan mengamalkan penjarakan sosial dan penjagaan kebersihan yang tinggi. Ia bukan pilihan tetapi kewajipan agar kita dapat menang dalam peperangan terhadap musuh yang tidak kelihatan ini.

Pandemik COVID-19 juga telah menjejaskan sektor pendidikan tinggi di Malaysia, tidak terkecuali Politeknik Mersing, Johor. Bagi memastikan kelangsungan proses pengajaran dan pembelajaran berlangsung dalam norma kehidupan yang baharu, pembelajaran dalam talian telah dilaksanakan melalui pelbagai kaedah dan platform mudahcara. Justeru, akauntabiliti perlu ada pada semua pihak bagi menjamin pembelajaran pelajar diutamakan. Akauntabiliti adalah seperti pelekat yang dapat mengikat dan menyatukan komitmen kita ke arah keberhasilan.

Akhir kata, saya mendoakan semoga semua warga PMJ akan terus berganding bahu dan bekerjasama dalam usaha menjayakan agenda pendidikan negara demi melahirkan generasi masyarakat Malaysia yang cemerlang dan gemilang walaupun dalam situasi dunia yang kian mencabar.

Hilmun Mohamed





Pari Meja Ketua Editor

Assalamualaikum dan salam sejahtera,

Setinggi-tinggi kesyukuran yang tidak terhingga kepada Allah SWT kerana dengan limpah dan kurniaNya, PESONA PMJ dapat diterbitkan buat julung kalinya. Tahniah dan syabas diucapkan kepada semua barisan jawatankuasa dan semua pihak yang terlibat secara langsung dan tidak langsung dalam menjayakan penerbitan buletin PESONA PMJ keluaran 1/2020.

Tiada sesiapa pun yang menduga bahawa tahun 2020 akan menjadi tahun yang amat menguji kita semua. COVID-19 memberi impak langsung khususnya kepada pertumbuhan ekonomi dunia serta kehidupan manusia sejagat. Tidak dapat dinafikan bahawa pandemik ini telah mengubah norma dan amalan biasa dalam setiap aspek kehidupan kita. Penularan wabak ini telah banyak mengubah amalan pendidikan di negara kita. Sepanjang tempoh perintah kawalan pergerakan dilaksanakan, pengajaran dan pembelajaran tidak lagi dijalankan secara bersemuka. Sebaliknya, proses pengajaran dan pembelajaran dijalankan secara atas talian. Para pensyarah menggunakan pelbagai kaedah untuk berhubung dengan pelajar seperti Google Classroom, Google Meet, Zoom, Microsoft Teams dan sebagainya. Walaupun negara sedang dalam tempoh Perintah Kawalan Pergerakan, namun ianya bukan penghalang kepada warga Politeknik Mersing, Johor (PMJ) untuk tidak melaksanakan aktiviti yang berkualiti.

Segmen Eksklusif kali ini memaparkan rencana mengenai salah seorang pensyarah Politeknik Mersing yang berjaya dinobatkan sebagai salah seorang Instructor Excellence Expert 2019 oleh Cisco Networking Academy. Anugerah ini merupakan penghargaan yang diberikan kepada 10% instruktur terbaik dari Cisco Networking Academy yang ada di seluruh dunia.

Melalui Segmen Fokus pula berkisar tentang kejayaan sekumpulan penyelidik dari Politeknik Mersing (PMJ) yang telah berjaya mencipta inkubator mudah alih bagi mengesan bakteria Escherichia Coli (E-Coli) dan Coliform dalam sumber air terawat ataupun tercemar dalam tempoh yang lebih singkat. Turut diselitkan beberapa program lain yang telah dijalankan sepanjang bulan Januari 2020 sehingga September 2020.

Akhir kata, marilah kita semua memainkan peranan masing-masing dalam memutuskan rantai jangkitan COVID-19, sentiasa menjaga penjarakan sosial dan patuhi semua SOP yang telah ditetapkan oleh Kementerian Pendidikan. InsyaAllah, berkat sokongan, kebersamaan dan kesabaran kita semua, mudah-mudahan kita akan berjaya mengatasi krisis ini dan dapat menjalani kehidupan seperti biasa. Amin Ya Rabbal Alamin

Sekian.

Syariffah Othman

Sidang Editor

Pengerusi **Pn. Hilmun binti Mohamed**
Tim. Pengerusi I **Hj. Mohamad Yusof bin Sulaiman**
Tim. Pengerusi II **Hj. Lajakarek bin Mohd Amin**
Penasihat **Wan Burhanuding bin Ibrahim**

Ketua Editor **Syariffah binti Othman**
Penolong Ketua Editor **Dr. Marriaty binti Morsin**
Editor **Nurul Najwa binti Md Yusof**
Setiausaha **Baizura binti Hasni**

Unit Kolumnis **Dr. Nurul Shida binti Noni**
Umainah binti Mokhtar
Hasnizah binti Geno
Ariffuddin bin Husof
Nur Atiqah binti Roslan
Khairul Fitri bin Mohd

Unit Rekabentuk Grafik **Mohd Khairul Anuwar bin Mohd Khairi**
Sahrol bin Ramli
Mas Ayu binti Mohd Ariff

Unit Penerbitan **Hanini binti Yusoff**
Yasmin binti Mohamad Yusof

Unit Galeri PMJ **Nadiah binti Kamarudin**
Nurhafizzah binti Tamsir

Unit Semakan Bahasa **Baizura binti Hasni**
Nur Atiqah binti Roslan
Khairul Fitri bin Mohd

Kandungan

Eksklusif

Eksklusif

- 7 Pensyarah Politeknik Mersing Berjaya Dinobatkan Sebagai Salah Seorang Dari Lapan Instruktur Terbaik Di Malaysia Oleh CISCO Networking Academy

Fokus

Fokus

- 8 Cetusan Memori Sewaktu Perintah Kawalan Pergerakan
- 10 Pensyarah Politeknik Mersing Cipta Inkubator Kesan Pencemaran Dalam Sumber Air Terawat
- 11 Pensyarah Politeknik Mersing Bangunkan Sistem Pengurusan Fail Secara Elektronik Untuk Pengurusan Yang lebih Sistematis
- 12 Perintah Kawalan Pergerakan Bukan Penghalang Kreativiti Pelajar

Galeri

Galeri

- 14 Program Mersing International Coastal Cleanup (MICC) 2020 & Pertandingan Lompat Tali Sunway Big Box, Nusajaya Johor.
- 15 Bengkel Pengenalan Kepada Sustainability Award Polytecnic (SAP) 2020 & Program Sukarelawan Zon Selatan Intai Desa @ Parit Sulong, POLYCC
- 16 Sesi Kunjungan Hormat Pengarah Politeknik Mersing Ke Pejabat Daerah Mersing & Sesi Kunjungan Hormat Yang Dipertua Majlis Daerah Mersing Ke Politeknik Mersing.

Jaringan

Jaringan

- 18 Jemputan Sebagai Konsultan Pemasaran Perniagaan
- 19 Lawatan Penanda Arasan Dan Kursus Kepimpinan Majlis Perwakilan Pelajar Politeknik Mersing Ke Politeknik Muadzam Shah
- 20 Majlis Menandatangani NOU Di Antara Politeknik Mersing Dan Yayasan Pembangunan Keluarga Darul Ta'zim (YPKDT)
- 21 Program Pengantarabangsaan Dengan Universitas Sriwijaya
- 22 Setulus Fitrah Cinta

Pelawat

Pelawat

- 23 Kunjung Hormat Dari Gabungan Pelajar-Pelajar Melayu Semenanjung
- 24 Lawatan Penanda Aras ILP Kuala Langat, Selangor Ke Jabatan Teknologi Maklumat & Komunikasi, Politeknik Mersing

Berita Warga

Berita Warga

- 25 Kejayaan Pensyarah Politeknik Mersing Dalam Pertandingan Best Practice In Teaching & Learning 2020
- 26 Webinar Camni Lah Nak Tulis Artikel 3.0 (CINTA 3.0)
- 27 Malam Ambang Merdeka Politeknik Mersing Johor 2020
- 28 Kemasukan Pelajar Mengikut Norma Baru Sesi Jun 2020
- 29 PMJ Di Gunung Arong
- 30 Rumah Ngaji Politeknik Mersing
- 31 Menyemarak Semangat Muafakat - Jiwa Murni R501

Laman Kreatif

Laman Kreatif

- 32 Karya Fiksyen: Buang Masa Atau Tidak?
- 34 Jimat Perbelanjaan: Pilihan Di Tangan Anda
- 36 Sempena Merdeka
- 37 Beratnya Tanggungjawab Seorang Yang Bernama Lelaki
- 39 Wakelet Penghubung Sumber Maklumat Secara Interaktif

Sekalung Penghargaan

Sekalung Penghargaan

- 40 Pihak Yang Terlibat Dengan PKP


Pensyarah Politeknik Mersing Berjaya Dinobatkan Sebagai Salah Seorang Daripada Lapan **Instruktur Terbaik Di Malaysia** Oleh CISCO Networking Academy

2 Jun 2020 - Tahniah dan syabas diucapkan kepada En. Abdul Farid Bin Azmi yang telah dipilih sebagai salah seorang Instructor Excellence Expert 2019 oleh Cisco Networking Academy. Anugerah ini merupakan penghargaan yang diberikan kepada 10% instruktur terbaik dari Cisco Networking Academy yang ada di seluruh dunia iaitu bersamaan dengan 22,000 instruktur. Di Malaysia, hanya 8 instruktur sahaja yang telah berjaya diiktiraf serta dinobatkan sebagai instruktur terbaik bagi tahun 2019.

Pemilihan Instructor Excellence Expert 2019 ditentukan menggunakan skor pengiktirafan instruktur berdasarkan beberapa faktor iaitu :

1. Penyertaan dalam kumpulan dalam talian instruktur serantau;
2. Penyertaan dalam peluang pengembangan profesional Cisco;
3. Perhatian terhadap keperluan pelajar, diukur dengan kepuasan dengan kemudahan makmal dan minat pelajar dalam kursus;
4. Prestasi pelajar pada percubaan pertama peperiksaan akhir;
5. Pengajar menggunakan sumber Cisco seperti nota dan penilaian.

Semoga kejayaan ini menjadi inspirasi buat kita semua!



Oleh : Umaimah binti Mokhtar



Cetusan Memori Sewaktu Perintah Kawalan Pergerakan

Mei 2020 - Sebaik sahaja YAB Perdana Menteri, Tan Sri Dato' Haji Muhyiddin Bin Haji Mohd Yassin mengumumkan bahawa Perintah Kawalan Pergerakan akan bermula pada 18 Mac 2020, kebanyakan pelajar dan kakitangan Politeknik Mersing telah mula beransur-ansur meninggalkan PMJ untuk pulang ke kampung halaman masing-masing. Namun demikian, terdapat sebilangan pelajar yang masih berada di dalam kawasan kampus mahupun yang menginap di luar kampus. Bagi pelajar yang masih berada di kawasan Mersing, adalah menjadi tanggungjawab PMJ untuk memastikan kebajikan mereka terjaga. Terdapat banyak peristiwa suka duka sepanjang pelajar-pelajar ini terkandas di Mersing sebelum mereka dibenarkan pulang oleh kerajaan. Sepanjang PKP, jawatankuasa Bilik Gerakan Covid-19 yang diketuai oleh Ketua Warden Kamsis telah bertungkus-lumus mengumpulkan data pelajar-pelajar yang terkandas serta seterusnya memastikan bekalan makanan dan keperluan harian mereka mencukupi termasuk urusan kesihatan pelajar. PMJ telah menerima bermacam jenis sumbangan dari pelbagai pihak seperti bekalan bahan mentah, bahan memasak, makanan siap, topeng muka, keperluan mandi dan lain-lain. Antara yang telah memberikan sumbangan adalah Kementerian Perdagangan Dalam Negeri dan Hal Ehwal Pengguna, Yayasan Food Bank, Syarikat Mondelez International, Dun Tenggaroh, Malaysian Relief Agency, Gabungan Pelajar Melayu Semenanjung, Maahad Tahfiz, Al-Khairiah, Usahawan Melayu Mersing, Majlis Agama Islam Daerah Mersing dan orang awam dan masyarakat sekitar Mersing.



Dalam masa yang sama, PMJ tidak melupakan pekerja-pekerja pembersihan dan landskap yang turut terjejas pendapatan akibat Covid-19. PMJ turut menyalurkan sumbangan kepada sebahagian daripada mereka bagi mengurangkan kesulitan yang mungkin sedang dihadapi. Malah, pada bulan Syawal yang lalu, PMJ turut menerima sumbangan dari Rumah Ngaji Negeri Johor untuk disampaikan kepada pekerja-pekerja tersebut.

PMJ juga turut menjalinkan kerjasama erat dengan beberapa agensi kerajaan seperti Pejabat Kesihatan Daerah Mersing, Balai Bomba dan Penyelamat Mersing, Pasukan Hazmat dari Johor Bahru serta Ibu Pejabat Polis Daerah Mersing bagi pelaksanaan prosedur keselamatan apabila kerajaan telah membenarkan pelajar IPT pulang ke kampung halaman masing-masing.



Selain daripada pelajar yang terkandas di Mersing, PMJ juga bertanggungjawab memastikan para pelajar yang sedang menjalani latihan industri turut dihantar pulang. Bagi merealisasikan penghantaran pulang semua pelajar yang terlibat, PMJ telah bekerjasama dengan beberapa politeknik dan universiti seperti Politeknik Shah Alam dan Universiti Teknologi Malaysia. PMJ mengucapkan syabas dan setinggi-tinggi penghargaan kepada semua pihak yang telah menyumbang kepada penjagaan kebajikan pelajar-pelajar PMJ. PMJ juga merasa amat berbangga kerana telah dikurniakan dengan pasukan pegawai PMJ yang amat berdedikasi, bertanggungjawab dan komited dalam melaksanakan tugas masing-masing tanpa mengira siang dan malam sepanjang PKP. Terima kasih diucapkan pasukan warden, pasukan Jabatan Hal Ehwal Pelajar, para pensyarah serta semua kakitangan PMJ yang telah terlibat secara langsung atau tidak langsung. Semoga lembaran sejarah ini menjadi antara memori termanis dalam hidup anda.

Oleh : Nur Atiqah binti Roslan, Nurul Najwa binti Md Yusof





Pensyarah Politeknik Mersing Cipta Inkubator Kesan Pencemaran Dalam Sumber Air Terawat



Siti Farah (kanan) bersama Pensyarah Jabatan Teknologi Maklumat dan Komunikasi PMJ Zainolrin Saari menunjukkan perisian QR Water, iaitu hasil ciptaan Inkubator mudah alih bagi mengesan bakteria E-Coli.

Mac 2020 - Setinggi-tinggi tahniah diucapkan kepada sekumpulan penyelidik dari Politeknik Mersing (PMJ) berjaya mencipta inkubator mudah alih bagi mengesan bakteria *Escherichia Coli* (E-Coli) dan Coliform dalam sumber air terawat ataupun tercemar dalam tempoh yang lebih singkat.

Ketua Penyelidik Siti Farah Hussin berkata, inisiatif melakukan inovasi itu tercetus apabila mendapati ahli mikrobiologi sering berdepan isu bagi menguji sampel air di kawasan punca air. Beliau berkata, kaedah tradisional bagi menjalankan ujian terhadap sampel air itu lazimnya dilakukan di makmal dengan mengambil masa yang lama kira-kira 18 hingga 24 jam selain menuntut pemerhatian lebih kerap dan proses ini dinamakan sebagai tumbesaran bakteria. Inkubator ini boleh digunakan secara sambungan arus terus (DC) iaitu dengan menggunakan punca bateri yang boleh bertahan sehingga dua hari (48 jam) ataupun menerusi plug biasa bagi mengenal pasti kehadiran bakteria E.Coli dan Coliform yang boleh dilakukan di mana-mana saja dalam tempoh enam jam sahaja.

Menurutnya, inkubator itu menggunakan teknologi pemprosesan imej dan Internet of Things (IoT) di mana kedua-duanya merupakan elemen penting dalam Revolusi Industri 4.0 (IR4.0). Inovasi itu telah mendapat tajaan Geran Penyelidikan TVET (Pendidikan dan Latihan Teknikal dan Vokasional) 'Applied Research Grant Scheme' (T-ARGS) Jabatan Pendidikan Politeknik dan Kolej Komuniti (JPPKK) yang bernilai RM86,500. Siti Farah berkata penyelidikan itu mendapat pengiktirafan bukan saja di dalam malah luar negara. Dalam pada itu, kertas kajian yang bertajuk 'Detection of *Escherichia Coli* Bacteria: A Review of Image Processing Methods' telah diterbitkan di *International Journal of Software Engineering and Computer Systems* (IJSECS).

"Kertas kajian ini juga telah dibentangkan di 'The 4th International Conference on Research in TVET Studies' (ICOR-TVET 2019) yang telah berlangsung di Universitas Pamulang, Indonesia. "Selain itu, inovasi ini turut memenangi pingat emas di '2020 Bangkok International Intellectual Property, Invention, Innovation and Technology Exposition' (IPITEx 2020), BITEC Thailand pada Februari lepas," katanya.

Oleh : Umaimah binti Mokhtar



Pensyarah Politeknik Mersing Bangunkan Sistem Pengurusan Fail Secara Elektronik Untuk Pengurusan Yang Lebih Sistematik

Tahniah diucapkan kepada Politeknik Mersing (PMJ) kerana telah berjaya mewujudkan satu sistem pengurusan fail di pejabat yang dikenali sebagai 'Electronic Filing Monitoring System' atau eFMs yang lebih sistematik, efisien dan mesra pengguna. Ketua penyelidik dan pensyarah kanan Jabatan Teknologi Maklumat dan Komunikasi PMJ Suhana Ismail berkata sistem ini bertujuan untuk memudahkan urusan merekod pergerakan fail dalam unit pentadbiran di sesebuah organisasi.

Menurut beliau, inisiatif itu diambil bagi memudahkan proses peminjaman dan pemantauan dilakukan selain pengguna dapat membuat semakan bagi mengetahui status semasa sesuatu fail dengan lebih pantas dan cekap. Sistem ini turut dilengkapi dengan ciri-ciri keselamatan laman web yang mana akan melindungi sistem dari sebarang serangan penggodam.



Mengulas lanjut beliau berkata sistem yang mula dibangunkan pada Jun 2018 dan menerima pengiktirafan dalam pertandingan di peringkat kebangsaan serta antarabangsa itu berjaya menarik perhatian beberapa agensi lain untuk menggunakannya. Menurutnya salah sebuah agensi luar yang menggunakan sistem eFMs adalah Pusat Koreksional Jasin, Melaka yang antara lain membantu institusi berkenaan mendapat pengiktirafan cemerlang dalam audit EKSA pada 2018 dan mendapat tempat ketiga dalam pertandingan Anugerah Kualiti (Pengurusan Fail dan MyPortfolio) 2019, Jabatan Penjara Malaysia.

“Awal tahun ini, kami sekali lagi diberi kepercayaan oleh pihak terbabit untuk membuat penambahbaikan serta menaik taraf sistem yang dibangunkan pada tahun 2018 dengan beberapa elemen dan fungsi tambahan. “Sehingga kini, sistem eFMs ini telah memenangi empat pingat emas dan dua pingat perak dalam pertandingan di peringkat kebangsaan dan antarabangsa,” katanya. “Sistem ini turut dinobatkan sebagai johan kategori pensyarah dalam pertandingan National Startup Bootcamp and Competition 2019,” katanya.

Oleh : Umaimah binti Mokhtar





Perintah Kawalan Pergerakan Bukan Penghalang *Kreativiti Pelajar*

2 Mei 2020 - Walaupun negara sedang dalam tempoh Perintah Kawalan Pergerakan, namun ianya bukan penghalang kepada Politeknik Mersing, Johor (PMJ) untuk tidak melaksanakan aktiviti pelajar yang berkualiti. PMJ telah melakar sejarah apabila buat pertama kalinya telah melaksanakan pertandingan inovasi projek akhir pelajar secara atas talian. "Student's Project Exhibition 5" atau SPEX5 merupakan pertandingan inovasi yang dianjurkan oleh Unit Penyelidikan, Inovasi & Komersial, PMJ (UPIK).

Sebanyak 14 kumpulan telah menyertai pertandingan SPEX5. Pertandingan ini melibatkan tiga buah jabatan akademik di PMJ iaitu Jabatan Perdagangan, Jabatan Kejuruteraan Elektrik dan Jabatan Teknologi Maklumat & Komunikasi. Peserta SPEX5 adalah terdiri daripada kumpulan-kumpulan pelajar yang telah memenangi pertandingan inovasi di jabatan masing-masing sebelum ini. Menurut ketua UPIK, Puan Nurhafizah Ismail, amalan lazim adalah, para peserta pertandingan dikehendaki untuk mempamerkan hasil kerja masing-masing dan memberi penerangan kepada juri secara berdepan. Namun demikian, disebabkan perintah kawalan pergerakan, UPIK telah mengambil keputusan untuk mengambil pendekatan berbeza di mana para peserta diminta untuk menghasilkan video terperinci mengenai hasil projek masing-masing dan dimuat naik di laman Youtube.




Semua hasil video projek pelajar telah dinilai oleh barisan panel juri yang dilantik daripada industri, universiti awam dan Institut Latihan Perindustrian. Antara kriteria projek yang telah ditetapkan merangkumi elemen output projek, pembentangan projek dalam talian, inovasi produk serta nilai komersial dan implikasi kepada komuniti. Hasil daripada pertandingan ini, Jabatan Kejuruteraan Elektrik telah memenangi kategori jabatan terbaik berdasarkan markah inovasi yang tertinggi. Dalam masa yang sama, sebanyak 3 buah projek telah terpilih untuk pendaftaran hakcipta. Pemilihan ini adalah berdasarkan kepada keaslian idea dan keberkesanan projek dalam menyelesaikan atau mengurangkan masalah sedia ada.



Pengarah Politeknik Mersing, Puan Hilmun Mohamed berpendapat, PKP bukan alasan untuk tidak mengenengahkan bakat pelajar yang kreatif dan inovatif. Menurut beliau lagi, pelajar PMJ telah banyak menghasilkan projek bermutu tinggi. Ini terbukti apabila terdapat projek-projek pelajar yang telah berjaya memenangi pertandingan baik di peringkat kebangsaan mahupun antarabangsa. Puan Hilmun berterima kasih kepada pihak UPIK, para pensyarah dan penyelia projek kerana telah berjaya membimbing para pelajar seterusnya merealisasikan perkara ini. Beliau turut mengucapkan tahniah kepada para pemenang. Beliau juga berharap agar usaha dalam menghasilkan projek akhir yang berkualiti tidak terhenti di sini dan hendaklah diketengahkan ke peringkat lain yang lebih tinggi seterusnya memupuk budaya pelestarian inovasi, penyelidikan dan komersialan di Politeknik Mersing.

Oleh : Nurul Najwa binti Md Yusof



PROGRAM MERSING INTERNATIONAL COASTAL CLEANUP (MICC) 2020

Tarikh : 19 September 2020
Tempat : Pantai Teluk Gorek, Mersing
Johor

Ringkasan Aktiviti :

Program Mersing International Coastal Cleanup (MICC) diadakan selari dengan World Cleanup Day yang dijalankan serentak seluruh dunia. Aktiviti pembersihan ini melibatkan kerjasama di antara Majlis Daerah Mersing, SWCorp Cawangan Mersing dan SWM Environment Sdn. Bhd. Cawangan Mersing serta pelbagai agensi kerajaan, NGO, Politeknik Mersing, UTM Skudai dan penduduk setempat.



PERTANDINGAN LOMPAT TALI SUNWAY BIG BOX, NUSAJAYA JOHOR PERINGKAT NEGERI JOHOR

Tarikh : 19 September 2020
Tempat : Nusajaya, Johor

Ringkasan Aktiviti :

Tahniah atas kejayaan team PMJUMPERS PMJ. Pasukan MJUMPERS PMJ telah berjaya merangkul hampir keseluruhan kategori yang disertai.



BENGKEL PENGENALAN KEPADA SUSTAINABILITY AWARD POLYTECHNIC (SAP) 2020

Tarikh : 14 – 15 September 2020
Tempat : Perpustakaan, Politeknik Mersing

Ringkasan Aktiviti :

Bengkel Pengenalan kepada Sustainability Award Polytechnic (SAP) 2020 yang berlangsung selama dua hari di Politeknik Mersing diadakan dengan kerjasama Bahagian Kurikulum, JPPKK. Bengkel ini bertujuan memberi pendedahan kepada semua Pengurus Hijau di 36 politeknik seluruh Malaysia berkaitan penilaian dalam pemantauan kejayaan Kampus Hijau melalui anugerah Projek mampan.



PROGRAM SUKARELAWAN ZON SELATAN INTAI DESA @ PARIT SULONG, POLYCC

Tarikh : 5 September 2020
Tempat : Intai Desa @ Parit Sulong, Batu Pahat Johor

Ringkasan Aktiviti :

Seramai 20 orang sukarelawan dari Politeknik Mersing telah terlibat dengan Program Sukarelawan Zon Selatan Intai Desa @ Parit Sulong, PolyCC Volunteer, Politeknik & Kolej Komuniti Zon Selatan 2020. Sebanyak 50 pokok dari pelbagai jenis ditanam di kawasan masjid tersebut. Aktiviti tersebut dilakukan bersama jawatankuasa masjid, pelajar dari Kolej Komuniti Rembau dan Kolej Komuniti Batu Pahat.



SESI KUNJUNGAN HORMAT PENGARAH POLITEKNIK MERSING KE PEJABAT DAERAH MERSING

Tarikh : 15 Julai 2020

Tempat : Pejabat Daerah Mersing

Ringkasan Aktiviti :

Puan Hilmun bt Mohamed, Pengarah Politeknik Mersing telah mengadakan kunjungan hormat ke Pejabat Daerah Mersing dan telah disambut mesra oleh Pegawai Daerah Mersing, Tuan Asman Shah Bin Abd Rahman. Turut hadir bersama Pengarah PMJ dalam kunjungan ini ialah Tuan TP(SA) dan PRO.



SESI KUNJUNGAN HORMAT YANG DIPERTUA MAJLIS DAERAH MERSING KE POLITEKNIK MERSING

Tarikh : 14 Julai 2020

Tempat : Politeknik Mersing, Johor

Ringkasan Aktiviti :

En. Norazmi bin Amir Hamzah, YDP Majlis Daerah Mersing telah mengadakan kunjungan hormat ke Politeknik Mersing dan telah disambut mesra oleh Pengarah PMJ Puan Hilmun bt Mohamed bersama pengurusan tertingginya.



BENGKEL KULINARI STRILOGY - CINNAMON ROLLS

Tarikh : 8 Julai 2020

Tempat : Kafe JTMK, Politeknik Mersing

Ringkasan Aktiviti :

Kelab Kebajikan & Rekreasi Staf Politeknik Mersing telah menganjurkan bengkel kuliner penyediaan 'cinnamon rolls'. Antara kandungan bengkel ini ialah cara penyediaan doh, cara menggulung doh, cara untuk membuat 'cream cheese frosting' serta cara untuk membuat 'butterscotch sauce'



KARNIVAL RUMAH NGAJI PMJ 2020

Tarikh : 23 - 25 Feb 2020

Tempat : Pusat Islam, Politeknik Mersing

Ringkasan Aktiviti :

Rumah Ngaji PMJ telah menganjurkan Karnival Rumah Ngaji selama tiga hari merangkumi pelbagai aktiviti yang melibatkan pelajar dan juga staf politeknik. Antara aktiviti yang dilaksanakan adalah Bengkel Penulisan Ilmiah, 'Fun-Day Couple Cooking' dan Bengkel Penyembelihan Halal.



Oleh : Syariffah binti Othman

Jemputan Sebagai Konsultan Pemasaran Perniagaan

Pada 24 Jun 2020, Ketua Jabatan Perdagangan Puan Norlela binti Sarani bersama-sama kakitangan Akademik dari Jabatan Perdagangan telah mengadakan satu lawatan ke Syarikat Bin Othmani di Parit Raja, Johor untuk membincangkan program kerjasama dua hala yang dapat memberikan kebaikan kepada pelajar-pelajar Politeknik Mersing dan juga kepada Syarikat Bin Othmani.

Perbincangan awal dan hasrat telah dijalankan secara tidak formal pada sesi Jun 2019. Walaubagaimanapun, kekangan di peringkat dalaman menyebabkan mesyuarat dan pertemuan tertangguh. Dengan berjayanya lawatan ini beberapa persetujuan telah berjaya dicapai oleh dua-dua pihak. Antara Persetujuan yang telah dicapai ialah pelajar dari jabatan perdagangan yang mengambil subjek "Digital Entrepreneurship" akan membantu syarikat dari segi pemasaran produk sekaligus memberi peluang kepada pelajar belajar secara praktikal dan memenuhi keperluan kurikulum jabatan perdagangan, disamping itu terdapat persetujuan dimana pelajar dari Politeknik Mersing boleh menjalani latihan industri di Syarikat Bin Othmani, mendapat persetujuan utk jalinan usahasama membangunkan Inkubator Keusahawanan di Politeknik Mersing (Poly Retail dibawah Jabatan Perdagangan) dan persetujuan untuk menjadi rakan kolaborasi industry (NoU) Jabatan Perdagangan dan Unit Keusahawanan.



Selari dengan subjek yang dipelajari pelajar di Jabatan Perdagangan di Politeknik Mersing pihak Syarikat Bin Othmani telah memaklumkan bahawa mereka memerlukan bantuan dari segi sistem perekodan dan pengurusan stok, pengurusan pemfailan dan dokumentasi syarikat dan pemasaran perniagaan.

Lawatan ini turut disertai Puan Roszita binti Jaffar Ketua Unit Keusahawanan PMJ, Puan Siti Nurazani binti Mustaffa Penasihat Persatuan Pelajar Jabatan Perdagangan, Puan Jama'latun Sa'adiah binti Ramli Pensyarah Jabatan Perdagangan dan Puan Fatinsyuhana binti Abdul Ghani pensyarah Jabatan Perdagangan.

Oleh : Ariffuddin bin Husof

Lawatan Penanda Arasan Dan Kursus Kepimpinan Majlis Perwakilan Pelajar Politeknik Mersing Ke Politeknik Muadzam Shah

Pada 13- 15 Februari 2020 yang lalu, satu program lawatan penanda aras dan kursus kepimpinan telah dijalankan dan disertai oleh Majlis Perwakilan Pelajar, Politeknik Mersing ke Politeknik Muadzam Shah, Pahang. Program ini merupakan satu aktiviti yang diadakan secara tahunan setiap kali selepas lantikan Majlis Perwakilan Pelajar (MPP). Ia merupakan luahan kolaborasi dan persepakatan antara MPP dua politeknik, untuk mengintegrestasikan semangat kerjasama antara satu dengan yang lain dan mengeratkan ukhwah yang terjalin.



Antara pengisian program adalah aktiviti jalinan kasih iaitu sesi perkenalan sesama ahli MPP, lawatan penanda aras, sesi perbincangan dan pertukaran idea serta program riadah bersama melalui aktiviti berkayak dan memanah. Melalui pelbagai pengisian dan aktiviti dalam program ini, mereka (Ahli MPP) dapat mengetahui dan mengenali dengan lebih mendalam tentang kelebihan dan kekurangan mereka sendiri dalam memberi arahan, mengawal emosi, memimpin, memikirkan idea, mencari jalan penyelesaian untuk merungkaikan sesuatu masalah dan sebagainya. Justeru itu, mereka dapat memperkembangkan kelebihan yang mereka peroleh dan memperbaiki setiap kelemahan yang ada dalam diri mereka. Adalah diharapkan agar para peserta memperoleh ilmu pengetahuan yang baharu, membentuk sahsiah dan kepimpinan dan memiliki semangat yang berterusan, untuk menjadi seseorang pemimpin di Politeknik masing-masing seterusnya menjadi contoh yang terbaik kepada pelajar lain.

Oleh : Nur Atiqah binti Roslan, Baizura binti Hasni

Majlis Menandatangani NOU Di Antara Politeknik Mersing Dan Yayasan Pembangunan Keluarga Darul Ta'zim (YPKDT)

Pada 16 Ogos 2020, telah berlangsung Majlis Menandatangani NOU di antara Politeknik Mersing dengan Yayasan Pembangunan Keluarga Darul Ta'zim (YPKDT) seterusnya diikuti dengan Majlis Perasmian Bilik Mama Friendly, Politeknik Mersing. Majlis ini disempurnakan oleh YB Zaiton Binti Hj Ismail, Pengerusi Jawatankuasa Pembangunan Wanita, Keluarga Dan Masyarakat Negeri Johor. Turut hadir adalah Puan Nurul Naqiah Binti Haji Fadzil, Ketua Pegawai Eksekutif YPKDT, YB Puan Hajah Alwiyah Binti Talib, ADUN Endau serta Puan Hilmun Binti Mohamed, Pengarah Politeknik Mersing.



Bilik Mama Friendly ini diselia sepenuhnya oleh Kelab Kebajikan dan Rekreasi PMJ (2KRS). Ianya adalah sebagai satu usaha untuk memberikan keselesaan kepada ibu-ibu bekerjaya di PMJ untuk meneruskan penyusuan susu ibu. PMJ juga mendokong Dasar Kebangsaan Penyusuan Susu Ibu dan menjadi IPT pertama di Johor yg mempunyai Bilik Mama Friendly.

Oleh : Umaimah binti Mokhtar

Program Pengantarabangsaan Dengan Universitas Sriwijaya

Pada 6-8 Januari 2020, pihak PMJ telah menerima kunjungan daripada wakil Fakultas Ilmu Komputer, Universitas Sriwijaya, Kota Palembang, Indonesia. Program ini adalah untuk merealisasikan permintaan pihak Universitas Sriwijaya yang ingin berkunjung ke politeknik dan seterusnya menjalinkan kerjasama yang lebih baik. Program yang berbentuk lawatan akademik dan kolaborasi ini merupakan wadah pertukaran pengetahuan, pengalaman, kemahiran serta teknologi di antara kedua-dua belah pihak sebagai sebuah institusi pendidikan yang bersifat global. Antara objektif program adalah untuk memperkenalkan institusi pendidikan (TVET) di Malaysia khususnya Politeknik Mersing, menjalinkan kerjasama strategik dan perkongsian ilmu serta mengeratkan kerjasama yang sedia terjalin di antara kedua-dua belah pihak dalam usaha memartabatkan institusi pendidikan masing-masing. Antara aktiviti yang dijalankan sebagai pengisian program adalah aktiviti pembelajaran sepanjang hayat dengan PMJ Cisco Academy iaitu Network Fun Games dan Cyber Addict. Turut diadakan sesi bual bicara mahasiswa antara kedua-dua institusi serta program kemasyarakatan iaitu Poly-Uni Social Responsibility (PSR). Program berimpak tinggi ini bukan sahaja dapat melonjak nama Jabatan Pengajian Politeknik dan Politeknik Mersing secara khususnya, malah para pensyarah juga berpeluang untuk berkongsi ilmu pengetahuan dan pengalaman mereka bagi meningkatkan tahap profesionalisma masing-masing. Seterusnya program ini juga diharap dapat membantu para pelajar yang terlibat untuk meningkatkan pengetahuan, kemahiran dan pengalaman dalam usaha melahirkan bakal graduan TVET yang berkualiti.

Oleh: Nur Atiqah binti Roslan, Baizura binti Hasni



Setulus Fitrah Cinta

Perkahwinan yang bahagia dan harmoni adalah impian semua individu yang berumah-tangga. Perkahwinan yang dilangsungkan atas dasar tanggung jawab dan kasih sayang pastinya bermula daripada pemilihan pasangan yang didasari dengan panduan Al-Quran dan As-Sunnah. Justeru itu, Jabatan Agama Islam Negeri Johor (JAINJ) dengan kerjasama Politeknik Mersing Johor (PMJ) telah mengadakan Program Setulus Fitrah Cinta pada 11 Mac 2020 bagi memberikan panduan dan kaedah kepada golongan pelajar yang bakal melalui proses pemilihan pasangan menurut hukum Islam.

Program berbentuk forum tersebut telah berlangsung di Pusat Islam Politeknik Mersing melibatkan 2 orang panel iaitu Tuan Haji Mohd Nasri bin Rahman, Kadi Daerah Pontian dan Ustazah Noor Hadiyah binti Haji Ahmad, Pegawai Psikologi Kanan, Universiti Teknologi Malaysia dan dikendalikan oleh Ustaz Khairul Fitri bin Mohd sebagai moderator. Seramai 600 orang telah hadir yang terdiri daripada siswa dan siswi PMJ. Program yang berlangsung bermula dari jam 8.00 malam itu telah dirasmikan oleh Tuan Haji Anwar bin Sarimin iaitu Timbalan Pengarah Operasi JAINJ.

Antara matlamat program ini diadakan adalah untuk meningkatkan ilmu dan penghayatan Islam dalam kehidupan seterusnya memberi panduan dalam pemilihan pasangan hidup mengikut ajaran Islam. Di samping itu, peserta juga didedahkan kefahaman untuk menjadi suami dan isteri yang terbaik demi mengekalkan kebahagiaan rumahtangga.

Oleh : Khairul Fitri bin Mohd



Kunjung Hormat Dari Gabungan Pelajar-Pelajar Melayu Semenanjung

Pada 16 Julai 2020, pihak pengurusan dan hal ehwal pelajar (HEP) Politeknik Mersing, telah menerima kunjung hormat dari Gabungan Pelajar-pelajar Melayu Semenanjung (GPMS) iaitu sebuah badan pergerakan sosial bukan kerajaan (NGO) yang sangat dikenali dan disegani. GPMS merupakan sebuah persatuan pelajar kebangsaan yang pertama ditubuhkan di negara ini dan segala perjuangannya sebelum merdeka merupakan sebahagian dari gerakan nasionalisme negara ini. Pada tahun-tahun selepas merdeka GPMS telah melaksanakan kegiatan-kegiatannya melalui program pendidikan, kebajikan, keagamaan dan kebudayaan yang dipadankan dengan tujuan pergerakan badan itu, iaitu "menjaga hak-hak, mengemukakan segala permintaan dan memperbaiki keadaan pelajar-pelajar dari segenap lapisan masyarakat".

Di antara kegiatan-kegiatan itu ialah konsep Kelas Bimbingan yang diperkenalkan pada tahun-tahun 1950-an yang kemudiannya menjadi aktiviti badan-badan belia tahun 1960-an. Selain dari itu, GPMS telah juga menjalankan program Gerakan Obor yang meniupkan kesedaran bahawa pelajaran adalah kunci kemajuan bangsa; melancarkan Operasi Pembangunan Masyarakat pada tahun 1971, dan seterusnya siri ceramah Teknik Menjawab Peperiksaan SPM dan STPM dan juga siri ceramah Bimbingan Kerjaya yang masih digiatkan hingga kini.

Kunjungan GPMS ke PMJ diketuai oleh Mohd Tarmizi Bin A. Razak, Pengerusi GPMS Negeri Johor Darul Ta'zim. Pelbagai perkara telah dibincangkan, khususnya berkenaan aktiviti dan program untuk para pelajar PMJ dalam usaha melahirkan pelapis pemimpin masa hadapan negara. Semoga kunjungan ini menjadi titik permulaan untuk banyak lagi program PMJ dan GPMS. Diharapkan PMJ dan GPMS dapat berganding bahu dan menjalinkan kerjasama yang lebih utuh dalam usaha membentuk modal insan yang berkualiti dan bersahsiah.

Oleh: Nur Atiqah binti Roslan, Dr.Marriatyi binti Morsin



Lawatan Penanda Aras ILP Kuala Langat, Selangor Ke Jabatan Teknologi Maklumat & Komunikasi, Politeknik Mersing

Politeknik Mersing telah menerima lawatan penanda aras daripada delegasi Institut Latihan Perindustrian Kuala Langat, Selangor (ILPKLS) yang diketuai oleh YBhg. Ts. Dr. Muhammad bin Yusof, Pengarah ILP Kuala Langat. Sementara itu, YBhg. Puan Hilmun binti Mohamed, Pengarah PMJ telah mengetuai sesi lawatan ke JTMK serta sesi perkongsian ilmu di antara kedua-dua pihak.

Oleh : Umaimah binti Mokhtar



Kejayaan Pensyarah Politeknik Mersing Dalam Pertandingan Best Practice In Teaching & Learning 2020

Best Practice ataupun Amalan Baik merujuk kepada pelbagai aktiviti, dasar dan pendekatan yang dijalankan oleh pensyarah untuk mencapai perubahan positif dalam sikap atau tingkah laku akademik pelajar. Politeknik Mersing sekali lagi mencipta kejayaan yang membanggakan apabila meraih 4 Emas dan 3 Perak di pertandingan Best Practice In Teaching & Learning 2020 anjuran bersama Jawatankuasa Pengajaran & Pembelajaran dan Unit Penyelidikan, Inovasi & Pengkomersialan (UPIK) Politeknik Ibrahim Sultan.

Pertandingan yang diadakan buat kali pertama ini melibatkan 29 peserta akhir dari Politeknik dan Kolej Komuniti seluruh Malaysia. Pertandingan ini telah diadakan secara atas talian pada 23 Julai 2020. Objektif pertandingan ini adalah untuk menyebarkan amalan baik khususnya dalam memantapkan pelaksanaan kurikulum di kalangan warga politeknik, kolej komuniti dan masyarakat luar, memberi penghargaan kepada amalan baik yang efektif, kreatif dan inovatif dan mengumpul idea untuk dijadikan bahan penulisan inovasi.

Oleh : Dr. Nurul Shida binti Noni



Berikut dilampirkan nama-nama pemenang yang memenangi pingat, emas, dan perak.

EMAS

Mobile Robot Kit

Nor Faizah binti Zailani @ Hj Ahmad

Robotic Tournament (ROBOTO)

Nor Faizah binti Zailani @ Hj Ahmad

Microsoft OneNote-Pusat Sehenti Pendidikan

Berkonsep Digital

Azlina binti Hamdan

Suhana binti Ismail

VLAN APPS

Siti Farah binti Hussin

PERAK

Gamification as a Supportive Tool: Math's Board Games for Interactive Learning in Mathematics

Dr. Nurul Shida binti Noni

Rosfazlizzah binti Zahit

Muhammad Amirul bin Abdullah

Aplikasi TEAMS Mengubah Konsep Pengajaran dan Pembelajaran (PDP) kepada Pembelajaran dan Pemudahcara (PDP)

Suhana binti Ismail

Azlina binti Hamdan

Penggunaan Aplikasi MyIPIntro Berkonsepkan Pembelajaran Abad ke 21

Zainolrin bin Saari

Suhana binti Ismail

Yasmin binti Mohamad Yusof

Webinar Camni Lah Nak Tulis Artikel 3.0 (CINTA 3.0)



Webinar perkongsian berhubung teknik penulisan artikel, “Camni lah Nak Tulis Artikel (CINTA 3.0)” telah dianjurkan oleh Unit Penyelidikan, Inovasi dan Komersialan, Politeknik Mersing Johor pada 20 Julai 2020. Sesi berjalan secara lancar oleh penceramah yang dijemput khas dari Fakulti Kejuruteraan Elektrik dan Elektronik, Universiti Tun Hussein Onn Malaysia (UTHM), Tuan Mohd Helmy bin Abdul Wahab dan moderator oleh Dr. Norhafizah Ismail, Ketua Unit Penyelidikan, Inovasi dan Komersialan, Politeknik Mersing

Webinar CINTA 3.0 telah menarik minat seramai 96 orang peserta dalam kalangan pensyarah Politeknik Mersing, dan juga seluruh warga Politeknik dan Kolej Komuniti Malaysia yang telah mendaftar secara atas talian. Menerusi pelantar Microsoft Teams, webinar ini juga telah bersiaran secara langsung di FB LIVE UPIK Politeknik Mersing.

Antara objektif webinar ini adalah untuk memberikan pendedahan teknik penulisan abstrak, pengenalan, sorotan dan kaedah kajian, dapatan, kesimpulan, cadangan dan isu plagiat serta parafrasa semasa menulis artikel.

Setinggi tahniah kepada semua Urusetia CINTA 3.0 yang terlibat dan peserta yang sudi hadir menimba ilmu penulisan saintifik dan peluang penerbitan bagi karya akademik yang telah dihasilkan.

Oleh : Dr.Nurul Shida binti Noni

Malam Ambang Merdeka

Politeknik Mersing Johor 2020

Sambutan Hari Kebangsaan pada tahun ini melakar sejarah baharu kepada warga Politeknik Mersing apabila buat julung kalinya Jabatan Hal Ehwal Pelajar menganjurkan program “Malam Ambang Merdeka Politeknik Mersing Johor 2020” mengikut garis panduan norma baharu berikutan pandemik Covid-19. Walaupun politeknik tidak mengadakan sebarang acara perbarisan dan perarakan seperti sebelum ini, namun sambutan malam ambang merdeka yang diadakan sudah cukup bermakna bagi para pelajar menghayati nilai patriotism dan menghargai jasa para pejuang negara yang telah berkorban demi agama, bangsa dan negara dalam memperjuangkan kemerdekaan negara.

Sambutan pada malam 30 Ogos itu dirasmikan oleh Tuan Haji Lajakarek Bin Mohd Amin, Ketua Jabatan Hal Ehwal Pelajar dengan acara simbolik mewarnakan kain rentang yang tertera logo berbentuk hati dengan warna bendera Jalur Gemilang menjadi latarnya bersempena tema “Malaysia Prihatin” yang membawa pengertian seluruh rakyat Malaysia berganding bahu memerangi pandemik COVID-19, sama ada penjawat awam, sektor swasta, sukarelawan mahupun orang perseorangan. Selain itu, sambutan itu juga diserikan dengan acara memotong kek berbentuk Jalur Gemilang serta persembahan nasyid oleh Kelab Rakan Ukhuwah. Detik 12 malam diraikan dengan penuh bersemangat oleh pelajar politeknik dimana acara kemuncak laungan “Merdeka!” sebanyak 7 kali oleh Tuan Haji Lajakarek bergema di dalam Dewan Permata Marjan.

Sempena bulan kemerdekaan ini juga, pihak Politeknik Mersing dengan kerjasama Majlis Perwakilan Pelajar juga menganjurkan pelbagai program seperti Pertandingan Pakaian Beragam, Pertandingan Mewarna Kanak-Kanak, Pertandingan Melukis Potret Kemerdekaan, Pertandingan Menghias Jabatan, Sajak Kemerdekaan, Pertandingan Nyanyian Kemerdekaan dan Pertandingan Selfie Merdeka.

Oleh : Nur Atiqah binti Roslan



Kemasukan Pelajar Mengikut Norma Baru Sesi Jun 2020

Pandemik COVID-19, masih lagi mengganggu fikiran dan membelenggu penduduk di seluruh dunia berikutan tiada vaksin yang ditemukan sehingga artikel ini ditulis, malahan kes masih tetap dilaporkan hari demi hari. Kredit perlu diberikan kepada pengurusan kesihatan di Malaysia setelah negara kita diiktiraf dunia sebagai antara negara yang mempunyai tadbir urus krisis pandemik yang terbaik.

Dalam menangani krisis kesihatan ini, Institusi Pengajian Tinggi (IPT) turut terkena tempias dan memberi refleksi mutlak dalam memberi cabaran terhadap suasana kerja mengikut gaya norma baharu. Politeknik Mersing (PMJ) juga tidak berkecuali dalam hal ini.

PMJ telah menerima kemasukan pelajar baru bagi sesi Jun 2020 pada 3 Ogos 2020 yang merangkumi tiga jabatan induk iaitu Jabatan Kejuruteraan Elektrik (JKE), Jabatan Teknologi Maklumat dan Komputer (JTMK) dan Jabatan Perdagangan (JP). Proses pendaftaran pelajar telah dilakukan berlandaskan garis panduan norma baru yang telah disusun oleh pihak politeknik. Ujian saringan suhu, penjarakan sosial serta penggunaan pelitup separuh muka dan penggunaan cecair pencegah kuman dikuatkuasa bagi kesemua pelajar, kakitangan dan pengunjung Politeknik Mersing Johor



Proses pendaftaran pelajar ini telah dilaksanakan secara berperingkat mengikut program pengajian bagi mengelak risiko penularan COVID- 19. Seterusnya pelajar-pelajar mendengar taklimat-taklimat penting secara atas talian. Program orientasi pelajar juga dilaksanakan di peringkat jabatan sahaja dan tidak dijalankan serentak bersama-sama jabatan lain seperti kebiasaannya.

Suasana hari pendaftaran diselubungi dengan pelbagai aksi dan juga emosi. Gembira, teruja, sayu dan hiba saling bercampur baur. Para pelajar diharapkan dapat mengadaptasi diri mereka dengan kehidupan kampus yang jauh dari keluarga, memburu cita-cita untuk menjadi orang yang berguna suatu hari nanti.

Oleh : Hasnizah binti Geno

PMJ Di *Gunung Arong*

Pada 28 Februari 2020 telah berlangsung Program Mendaki Gunung Arong bersama team Polysport anjuran Unit Sukan dan Team Polysport yang diketuai oleh Muhamad Aziran bin Mohd Salleh pelajar dari jabatan Kejuruteraan Elektrik Politeknik Mersing. Program ini menyasarkan seramai 60 orang peserta dari kalangan "Team Polysport" itu sendiri dan staff Politeknik Mersing. Para peserta serta urusetia telah menjayakan program yang bertempat di Gunung Arong Recreational Forest Mersing, Johor.

Program ini bermula seawal jam 6.30 pagi dengan para peserta dan urus setia berkumpul di perkarangan Pusat Islam Politeknik Mersing. Antara aktiviti yang dijalankan dalam program ini adalah aktiviti mendaki gunung disamping para peserta mengutip sampah sepanjang perjalanan peserta dari kaki gunung sehingga ke puncak gunung bersama-sama dengan Pejabat Hutan Mersing. Program ini diteruskan lagi dengan aktiviti membersihkan pesisiran pantai di Teluk Gorek, Mersing.



Kehadiran para peserta dari program ini bukan sahaja mengisi ruang aktiviti mereka, tetapi adalah untuk mewujudkan rasa tanggungjawab sosial serta nilai murni untuk menjaga dan menghargai keindahan alam semulajadi dan juga sikap bertanggungjawab kepada pendaki lain di samping menerapkan pengetahuan pelajar Politeknik Mersing dari sudut kepimpinan, akademik serta kemahiran insaniah dan mewujudkan semangat berkumpulan dan individu yang komited dalam mengendalikan sesuatu program.

Sikap sebenar yang ada dalam individu akan terlihat jelas ketika mengikuti aktiviti 'di luar bilik kuliah' seperti pendakian ini. Program ini dilihat dapat memupuk semangat berpasukan serta saling mempercayai bagi pelajar-pelajar serta membudayakan gaya hidup sihat dengan beriadah di kalangan pelajar.

Selain itu program ini diadakan juga untuk memperingatkan kepada penggemar aktiviti mendaki sentiasa peka dengan keadaan sekeliling termasuk menjaga keselamatan, kesihatan dan tingkah laku yang boleh mengundang risiko.

Oleh: Ariffuddin bin Husof



Rumah Ngaji Politeknik Mersing

RUMAH NGAJI Politeknik Mersing telah dilancarkan pada 8 OGOS 2019, berhasrat untuk memenuhi keperluan warga PMJ dari sudut pengisian aktiviti-aktiviti pembudayaan Al-Quran dan nilai-nilai kerohanian kepada semua warga Politeknik Mersing samada pensyarah, kakitangan pelaksana, pelajar, pekerja kontrak, anak-anak kakitangan serta komuniti setempat sekitar politeknik.

Rumah Ngaji juga diilhamkan penubuhannya bagi menggerakkan kelab pelajar serta kelab kakitangan untuk bersama-sama mengembeleng tenaga bagi mengaktifkan program yang memberikan input kerohanian dan motivasi kepada seluruh warga Politeknik Mersing. Salah satu program yang berjaya dilaksanakan pada tahun ini adalah Karnival Rumah Ngaji di mana ia dijalankan pada 23 – 25 Februari 2020. Karnival ini merangkumi empat program berbeza di dalam satu Karnival iaitu Bengkel Penulisan Ilmiah Popular, Slot Tanyalah Ustazah : Fiqh Wanita, Praktikal Sembelihan dan Fun Day Couple Cooking. Program yang telah dilaksanakan ini memberi impak yang sangat baik kepada semua peserta dan urusetia. Pengalaman dan ilmu yang diperolehi dapat dimanfaatkan oleh semua yang terlibat.




Rumah Ngaji juga mengadakan program sepanjang Tahun 2020 iaitu Program Celik Al-Quran yang merupakan program pengajian Al-Quran secara berterusan setiap minggu kepada kakitangan Politeknik Mersing. Beberapa guru al-Quran dilantik dikalangan pensyarah politeknik bagi membantu menjadi pembimbing rakan-rakan dalam mempelajari, menghayati dan memahami al-Quran. Program Celik Al-Quran juga menjemput beberapa penceramah luar bagi membudayakan al-Quran di Politeknik Mersing.

Selain itu, Kelab Kebajikan Pelajar Jabatan Teknologi Maklumat juga bersama-sama Rumah Ngaji telah mengadakan Kelas Al-Quran secara atas talian semasa tempoh Perintah Kawalan Pergerakan (PKP) yang bertarih 19 Mei 2020. Usaha ini menampakkan hasil dengan melihat kepada respon pelajar yang sangat berminat mempelajari al-Quran walaupun belajar al-Quran secara atas talian.

Oleh : Suraini binti Haji Ripin

Menyemarak Semangat Muafakat Jiwa Murni R501

Melihat keadaan yang tidak menentu ketika ini akibat pandemik Covid-19, terdapat keperluan bagi semua rakyat untuk bersama-sama menangani penularan wabak itu. Politeknik Mersing Johor telah mengambil inisiatif dengan melaksanakan aktiviti gotong royong perdana sebagai tanda sokongan bagi memerangi wabak COVID-19. Program yang dinamakan sebagai Menyemarak Semangat Muafakat - Jiwa Murni R501 telah diadakan pada 20 Julai yang lalu di mana semua pihak termasuk pihak pengurusan tertinggi, pengurusan kamsis, warden bersama-sama semua kakitangan telah bergotong royong mengubahsuai kedudukan perabot di dalam bilik asrama sebagai persediaan untuk menerima sebahagian pelajar yang akan pulang ke kamsis bagi sesi Jun 2020. Aktiviti gotong-royong ini juga telah diserikan dengan kehadiran YB Puan Hajah Alwiyah binti Talib yang telah menaja makan minum semua warga pada hari tersebut.



Tujuan ubahsuai dilakukan adalah untuk memastikan terdapat jarak yang selamat di antara pelajar ketika berada di dalam bilik masing-masing. Diharapkan pelajar yang akan melaporkan diri nanti dapat menjalani hidup dikamsis dengan selesa untuk menyambung pelajaran. Pelajar juga disarankan agar sentiasa terus mengamalkan norma baharu seperti sentiasa mengamalkan penjarakkan sosial di antara rakan-rakan, kerap mencuci tangan serta amalan kebersihan lain di dalam kamsis. Selain daripada kakitangan PMJ, bantuan juga diterima daripada 75 pelatih dan jurulatih Kursus Asas Perajurit Muda Sukarela Siri 1/2020 Rejimen 501 Askar Wataniah yang sedang menjalani latihan di PMJ. Program ini telah berlangsung dengan jayanya. Syabas kepada semua yang terlibat!

Oleh : Hasnizah binti Geno, Nurul Najwa binti Md Yusof



Karya Fiksyen: Buang Masa Atau Tidak?

Sebagai seorang yang gemarkan karya fiksyen, saya pernah dikritik oleh kenalan saya kerana menurutnya, karya fiksyen hanya membuang masa dan sia-sia. Kandungannya hanyalah imaginasi yang tidak boleh memberi apa-apa manfaat kepada pembaca. Namun demikian, hati saya membantah. Saya membantah kerana saya yakin hasil daripada pembacaan, saya lebih mudah mengadaptasikan diri dengan hitam putih kehidupan. Namun demikian, pada waktu itu, saya tidak menzahirkan bantahan saya kerana saya tidak tahu bagaimana untuk menyusun perkataan bagi menjustifikasikan kebaikan membaca fiksyen. Saya telah membaca pelbagai jenis genre fiksyen sejak dari kecil lagi seperti satira, kisah dongeng, jenayah, epik, kisah romantik, realistik, lagenda, keajaiban realisme, fantasi, kisah seram dan kisah kekeluargaan. Dan setiap satunya telah membuka minda saya untuk melihat setiap unsur kehidupan dari perspektif yang berbeza.

Sebagai contoh, ketika membaca karya Keris Mas bertajuk Rimba Harapan, saya telah didedahkan dengan kisah jerih perih kehidupan penduduk kampung yang tergugat dek dasar penjajahan yang memaksa mereka meluaskan tanaman getah dan perlombongan. Contoh yang lain pula, ketika membaca karya Lisa Genova bertajuk Still Alice, saya telah didedahkan dengan perjuangan wanita bernama Alice yang telah disahkan menghidap alzheimer ketika dia berada di puncak kerjayanya. Bagaimana suami dan anak-anaknya bergelut dengan kemelut emosi masing-masing tatkala berdepan dengan perubahan drastik ini.





Ini hanyalah sebahagian dari karya yang saya baca selain daripada karya lain seperti perjuangan kanser, perjuangan menentang rasisme, penipuan, pengkhianatan, kemaafan dan kisah-kisah lain yang sememangnya berlaku di sekeliling kita.

Baru-baru ini saya telah terjumpa artikel dari Harvard Business Review yang bertajuk: "The Case of Reading Fiction." Menurut artikel tersebut, dapatan daripada penyelidikan dalam bidang neurosains membuktikan bahawa karya fiksyen mampu melatih pembaca untuk menjadi seseorang yang mempunyai kesedaran terhadap diri sendiri dan sekelilingnya, empati, murah hati, mempunyai ketangkasan belajar serta fleksibiliti yang tinggi, mampu berfikir secara kritis dan keupayaan untuk menguasai teori berfikir. Dari sudut psikososial psikologi, Teori Berfikir atau Theory of Mind ini dikaitkan dengan kemahiran sosial-kognitif yang penting yang melibatkan keupayaan untuk memikirkan keadaan mental, baik diri kita sendiri mahupun orang lain. Ini termasuklah kemampuan untuk memahami orang lain yang berbeza kepercayaan dan pemikiran dari diri kita dan kesemua ini dikaitkan dengan kecerdasan emosi yang tinggi.

Selain daripada itu, kajian yang telah dijalankan oleh Universiti of Toronto menunjukkan bahawa, membaca karya fiksi adalah cara yang berkesan untuk meningkatkan kemampuan seseorang untuk mengekalkan minda yang sentiasa terbuka semasa memproses maklumat. Hasil daripada keterbukaan ini membawa kepada peningkatan kemahiran untuk membuat keputusan yang berkesan dalam kehidupan seharian mahupun pekerjaan.

Oleh itu, saya sarankan, di samping membaca karya ilmu pengetahuan seperti sejarah, sains dan teknologi, kita juga perlulah membaca karya fiksi pelbagai genre agar kita dapat memahami kepelbagaian emosi dan mental yang wujud di sekeliling kita. Hidup ini bukan hanya tentang kita, ia juga tentang orang lain. Bagaimana kita menginginkan keperluan emosi kita dipenuhi oleh suami, isteri, anak-anak dan rakan-rakan, begitu juga mereka. Kita juga perlu memenuhi keperluan emosi mereka. Begitu juga dengan pengurusan konflik di mana karya fiksi telah banyak mendidik saya bagaimana menguruskan konflik ketika berhadapan dengan individu ataupun situasi yang sukar dan getir. Jadi, apa kata anda? Adakah anda akan mula membaca karya fiksi selepas ini?

Oleh : Nurul Najwa binti Md Yusof



Jimat Perbelanjaan : Pilihan Di Tangan Anda

Artikel ini mempunyai info menarik yang ramai terlepas pandang. Di rumah anda, terdapat 5 peralatan atau perkakas elektrik yang merupakan punca bil elektrik rumah anda melambung tinggi adalah komputer, televisyen, pengeras telefon, dekoder TV dan mesin air sejuk & panas. Punca bil elektrik rumah yang mahal sebenarnya berbalik kepada cara penggunaan kita terhadap perkakas elektrik dalam kehidupan seharian kita. Sekiranya kita mempunyai tabiat gemar menetapkan peralatan kita kepada standby mode atau sleep mode, sebenarnya pembaziran tenaga elektrik masih berlaku.

Oleh itu, adalah lebih baik sekiranya menutup suis dan mencabut soket daripada plak kerana sekiranya soket masih terpasang, tenaga elektrik masih mengalir dan terbazir begitu sahaja. Tambahan pula, dengan mengubah amalan kepada mencabut soket daripada plug, kita dapat melindungi diri dan harta benda dari bahaya kerosakan kerana soket yang masih terpasang meningkatkan risiko untuk disambar petir dan jangka hayat peralatan juga akan menjadi semakin pendek.

Selain itu, tabiat kita yang gemar menetapkan suhu penghawa dingin hingga ke 16 darjah celcius untuk waktu yang lama juga merupakan salah satu faktor pembaziran tenaga. . Tips jimat bil elektrik terbaik adalah dengan menggunakan penghawa dingin pada waktu siang sahaja dan buka pada suhu di antara 23 – 25 darjah celcius

Comparison Of Electricity Cost & Consumption With Same Hot Water Usage

Type of heater	Rated Current	Total Electricity Consumption A Year ¹	Total Cost A Year ²
HYDROPNE EcoHeater	1500 W	1.5kW X 2 hrs X 365 days = 1095 kWh	RM 372.30
Conventional Storage Water Heater	3000 W	3kW X 2 hrs X 365 days = 2190 kWh	RM 744.60

1. Power consumption is worked out based on 80L capacity with 2 showers a day and require heating frequency of 2 times a day
2. The cost shown above is based on TNB tariff at RM 0.34 / kWh for reference purpose only

Menggunakan pemanas air pada waktu pagi adalah lebih sememangnya menyamakan berbanding air sejuk yang membeku. Namun demikian, anda perlu tahu bahawa pemanas air menggunakan elektrik yang banyak. Oleh itu, boleh sahaja anda selang-selikan penggunaan air panas dengan air sejuk; dan mandi menggunakan air sejuk terbukti lebih menyihatkan berbanding menggunakan air panas. Anda disarankan menggunakan mentol yang jimat tenaga seperti mentol jenis LED. Ketika awal-awal dahulu sewaktu mentol ini diperkenalkan, kos bagi mentol ini agak tinggi. Walau bagaimanapun, ianya mampu menjimatkan bil elektrik rumah anda untuk tempoh masa yang agak lama. Kini harganya sudah setanding dengan mentol pendaflour dan ada kalanya lebih murah. Gunakan lampu jenis LED jika anda ingin membuka lampu tersebut dalam jangka masa lebih daripada 6 jam setiap hari.

TARIF ELEKTRIK DOMESTIK SEMENANJUNG MALAYSIA

Penggunaan elektrik (kWj)	Kadar tariff (RM)	Unit penggunaan elektrik (kWj)
• 1-200	0.218	200
• 201-300	0.334	100
• 301-600	0.516	300
• 601-900	0.546	300
• 901 dan ke atas	0.571	Apa-apa nilai penggunaan elektrik dalam julat ini



Semua ini adalah contoh cara-cara untuk menghadkan penggunaan elektrik. Tutup semua suis setelah selesai menggunakan setiap peralatan. Pendek cerita, untuk elakkan pembaziran tenaga elektrik, tutup suis apabila peralatan elektrik tidak lagi digunakan. Itulah beberapa kaedah untuk mengoptimumkan penjimatan tenaga elektrik secara umum. Apabila penggunaan tenaga elektrik dapat dilakukan, secara tidak langsung, jumlah bil elektrik bulanan juga akan berkurangan. Jadi, selamat berjimat dan anda mampu mengubahnya!

Oleh : Mohammad Yusof bin Sulaiman



Sempena Merdeka

Digunting potong bendera
Dibuat baju
Sempena merdeka.

Dipancang bendera sekitar yang ada
Meriah semangat jalur gemilang
Lalu hujan;
bendera basah jatuh ke tanah
Dipijak dikotori lopak
Sempena merdeka

Si jantan gigih beraksi
Si gadis mengangkat bendera putih
Bilik hotel menjadi saksi
Bukti cinta rakus ditagih
Sempena merdeka


Kedai kedai menyahut semangat
Bendera kuning - Jualan murah! Jualan murah!
Melaku Stok akhir sebelum stok baru
Sempena merdeka

Baju bendera terperuk di almari
Bendera yang di lopak, yang jatuh di tanah
Dan si gadis yang cintanya diratah
Tiada siapa peduli
Dan kedai kedai mengira untung akhir
Sebelum bulan baru
Sempena merdeka.

Ayuh Anak Bangsa...
Merdeka itu bukan hanya
Pada cerminan bendera sahaja
Yang lebih ampuh untuk bekalan anak cucu
Adalah Jatidiri yang Merdeka
Pemikiran yang merdeka
Daya kreatif dan inovatif
Untuk mempertahankan kemerdekaan

Jangan hanya merenung ke Barat
Untuk hiburan sahaja
Kerna Budaya Timur juga
Ada contoh kemajuan, teknologi dan ekonomi
Semangat juang yang mereka terapkan
Untuk menjadi Negara Maju
Ayuhhhh terus Maju, Negaraku Malaysia!!!

Oleh : *Zalina binti Sungip*



Beratnya Tanggungjawab Seorang Yang Bernama **Lelaki**

Selalunya wanita berkata alangkah senangnya menjadi lelaki kerana tidak perlu mengandung dan melahirkan anak. Hakikatnya tidak begitu kerana di atas bahu lelakilah terpituknya segala tanggungjawab terhadap wanita.

Lihatlah bagaimana 4 jenis lelaki boleh ditarik ke dalam neraka :

1. Ayah

Apabila seseorang yang bergelar ayah hanya memenuhi keperluan harian dan memberi kemewahan sahaja tetapi tidak mempedulikan akhlak dan aktiviti seharian anak-anaknya. Contohnya dia tidak memberikan segala didikan agama seperti mengajar solat, mengaji dan membuat pemantauan dari semasa ke semasa. Lebih-lebih lagi jika mereka berjauhan dan di luar rumah. Ayah yang membiarkan anak-anak perempuannya tidak menutup aurat, bergaul bebas dengan bukan mahram/ muhrim, maka dia akan ditarik ke neraka oleh anaknya.

2. Suami

Apabila si suami tidak mempedulikan tindak tanduk isterinya. Tidak menjaga aurat dan kehormatan diri di luar rumah mahupun di pejabat, memperhiaskan diri bukan untuk suami tetapi untuk pandangan kaum lelaki yang bukan mahram/ muhrim. Apabila suami mendiamkan diri walaupun dia seorang yang sangat alim, maka dia akan turut ditarik oleh isterinya ke neraka.



3. Abang-abang

Apabila ayah sudah tiada, tanggungjawab menjaga maruah wanita jatuh ke bahu abang-abangnya. Jikalau mereka hanya mementingkan keluarganya sahaja dan adik perempuannya dibiarkan melencong dari ajaran Islam, tunggulah tarikan adiknya ke neraka kelak.

4. Anak lelaki

Apabila seorang anak tidak menasihati ibunya perihal kelakuan yang haram dalam Islam, contohnya apabila ibu atau sesiapa membuat kemungkaran mengumpat memfitnah dan sebagainya, maka anak itu hendaklah menghentikan perbuatan tersebut jika tidak anak juga akan disoal dan dipertanggungjawabkan di akhirat kelak. Nantikan tarikan ibunya ke neraka.

Maka kita lihat betapa hebatnya tarikan wanita bukan sahaja di dunia malah di akhirat pun tarikannya begitu hebat, maka kaum lelaki yang bergelar ayah, suami, abang atau anak haruslah memainkan peranan masing-masing iaitu menyuruh berbuat kebaikan dan mencegah kemungkaran.

Firman Allah SWT:

“Hai orang-orang yang beriman, peliharalah dirimu dan keluargamu dari api neraka yang bahan bakarnya adalah manusia dan batu, penjaganya malaikat-malaikat yang kasar, yang keras, yang tidak mendurhakai Allah terhadap apa yang diperintahkan-Nya kepada mereka dan selalu mengerjakan apa yang diperintah.” (At-Tahrim: 6)

Marilah kita berusaha menjadi seorang Mukmin dan Muslim sejati yang tinggi kedudukannya di sisi Allah SWT. Allah SWT berjanji di dalam Al-Quran untuk membalas keimanan dan amal soleh seseorang itu dengan ganjaran syurga. Semua Muslim yakni yang mengucap kalimah tauhid dijamin masuk syurga dengan itu janganlah mensia-siakan peluang yang Allah SWT berikan pada kita dengan sebab tidak menunaikan amanah dan kewajiban yang diperintahkanNya, wallahu'alam.

Di akhirat, wanita yang solehah akan tetap masuk syurga walaupun suaminya seorang yang tidak bersembahyang, tidak berpuasa atau berdosa, lantaran wanita tidak dipertanggungjawabkan atas kejahatan atau maksiat itu, asalkan dia tidak reda dengan perbuatan mungkar tersebut.

Berbanding dengan lelaki, mereka dipertanggungjawabkan untuk menjaga wanita samada isteri, anak, adik, kakak mahupun ibunya. Wanita pendurhaka boleh menarik lelaki-lelaki terjerumus bersamanya ke dalam neraka. Artikel ini bukan untuk memperkecilkan wanita tetapi sebaliknya supaya kaum lelaki dapat memainkan peranannya dengan sebenar-benarnya, adil dan saksama berdasarkan Al-Quran dan As-Sunnah serta berwaspada akan tanggungjawab yang dipikulnya di dunia hinggalah mereka dihadapkan kepada Mahkamah Allah Subhanahu wa Taala di Mahsyar kelak. Lelaki itu ialah ayah, suami, abang dan anak lelaki.

Oleh : Ani Raihana binti Rosli


wakelet Penghubung Sumber Maklumat Secara Interaktif

Adakah anda masih menyimpan semua dokumen di dalam folder peribadi anda? Atau anda mempunyai masalah untuk menyimpan maklumat pelbagai format pada satu lokasi? Seterusnya, adakah anda menghadapi kesukaran untuk berkolaborasi semasa menggunakan maklumat tersebut?

Saya pasti itu adalah antara masalah yang sering dihadapi oleh semua. Namun, dengan penggunaan Wakelet, kita boleh ucapkan selamat tinggal untuk semua masalah di atas. Wakelet merupakan satu aplikasi atas talian yang membolehkan anda untuk mengumpul dan menyimpan maklumat yang menarik, sama ada maklumat tersebut adalah milik anda atau maklumat daripada Internet. Lebih menarik lagi apabila Wakelet boleh diakses pada bila-bila masa melalui komputer peribadi atau aplikasi di telefon pintar.

Wakelet berfungsi untuk anda menghimpunkan 10 bahan dalam bentuk yang berbeza iaitu secara url, text, himpunan video dari Youtube, tweet dari Twitter, bookmarks, image, pdf, bahan dari Google Drive atau OneDrive serta video dari Flipgrid. Malah dengan menggunakan Wakelet, anda boleh berkolaborasi bersama-sama dengan rakan sekerja ataupun pelajar bagi menambah serta menyusun bahan dalam usaha menjadikan Wakelet lebih menarik serta berinformasi.

Untuk makluman, koleksi Wakelet yang anda miliki turut boleh dikongsikan melalui laman sosial, berkongsi pautan dengan sesiapa sahaja serta boleh dikongsikan ke dalam blog atau mana-mana platform lain secara "embedded". Amat menarik juga apabila koleksi Wakelet anda boleh dimuat turun dalam bentuk pdf.



Sebagai pensyarah sudah pasti anda mempunyai pelbagai bahan PdP serta merancang untuk melakukan pelbagai aktiviti bersama pelajar.

Saya kongsi beberapa idea bagaimana anda boleh menggunakan Wakelet di dalam PdP :

1. Pensyarah menyimpan semua nota kuliah, jawapan tutorial serta bahan-bahan lain di dalam Wakelet.
2. Pensyarah menjadikan Wakelet sebagai digital portfolio pelajar.
3. Pensyarah menggunakan Wakelet sebagai storytelling tool semasa kuliah.
4. Wakelet sebagai platform untuk berkolaborasi antara pensyarah dan pelajar atau pelajar sesama rakan kuliah masing-masing.
5. Pelajar muat naik semua bahan yang ingin dipaparkan ke dalam Wakelet semasa aktiviti Gallery Walk dilaksanakan.
6. Pelajar menghantar tugas melalui Wakelet.
7. Menghasilkan e-newsletters menggunakan Wakelet

Wakelet yang boleh diakses secara percuma kepada semua pengguna wajarlah digunakan oleh semua terutamanya pensyarah dan pelajar bagi memastikan proses PdP dapat dilaksanakan dengan secara kolaboratif dengan cara yang lebih interaktif serta kreatif.

Oleh : Azlina binti Hamdan

Ketika dalam Perintah Kawalan Pergerakan, Politeknik Mersing telah menerima banyak sumbangan dan bantuan dari pelbagai agensi dan individu bagi membantu pelajar-pelajar PMJ yang terkandas. Malah, PMJ turut menerima sumbangan untuk diagihkan kepada pekerja kontrak pembersihan dan landskap yang memerlukan. Pihak PMJ mengucapkan setinggi-tinggi penghargaan dan terima kasih kepada semua agensi dan individu yang terlibat.

1. Kementerian Perdagangan Dalam Negeri dan Hal
Ehwal Pengguna
2. Persatuan Rumah Ngaji Negeri Johor
3. Maahad Tahfiz Al-Khairiah Mersing
4. YB Raven Kumar Krishnasamy , DUN TENGGAROH
5. Gabungan Pelajar-pelajar Melayu Semenanjung
6. Syarikat Mondelez International
7. Malaysia Relief Agency
8. Majlis Agama Islam Daerah Mersing
9. Usahawan Melayu Mersing
10. Pejabat Kesihatan Daerah Mersing
11. Balai Bomba & Penyelamat Mersing
12. Pasukan Hazmat Johor Bahru
13. Ibu Pejabat Polis Daerah Mersing
14. Puan Norizan dari Mersing
15. Puan Farah dari Mersing
16. Datin Nora dari Johor Bahru
17. Serta semua warga Mersing yang telah menyampaikan
Sumbangan





POLITEKNIK MERSING
JALAN NITAR
86800 MERSING
JOHOR DARUL TAKZIM